

四庫全書

集部

欽定四庫全書

集部

明詩綜卷七十三

詳校官中書

臣

涂日煥

主事銜臣徐以坤覆勘

總校官降調編修

臣

倉聖脉

校對官庶吉士

臣

潘魯起

謄錄監生

臣

楊恪

欽定四庫全書

明詩綜卷七十三

翰林院檢討朱彝尊編

周鏞一首

鏞字仲馭金壇人崇禎戊辰進士南京禮部員外郎為阮大鍼所殺有十四哀詩

孝子魏君學泖

有鳥栖中林夜半巢忽覆兩羽既傾折遺雛寧復敷嗟

哉魏公子痛父無能救乞食向長安知交孰肯覲投書
數千言聽之耳如褻世路已如斯呼天但搔首扶櫬江
南歸墓旁日相守父存不敢先父沒不敢後含涕入下
泉一死良無疚

呂大器

三首

大器字先自遂寧人崇禎戊辰進士除行人歷
兵部左侍郎甲申以吏部左侍郎回里有集

詩話呂公驅馳南北盡瘁行間五言如野寺依
巖立官衙傍水開孤燈寒殿壁落月映山城土

濟蟬吟屋林疎月上扉野狐衝馬立山鬼伺人
驕精衛悲銜土鷓鴣啼滿山雲烟春尚在烽火
畫相連淚盡銅駝棘歌殘玉樹花豈無丹
闕戀終抱白雲思忠孝之誠溢於言表

閒居

好山當面出旭日敞幽軒煨芋聊充飯烹泉不問源譚
玄藏史李學稼小人樊數得林間趣花開鳥亦言

晚次江門

世事何年定江臯且振衣樹紅橙子熟濤白鯉魚肥獨
鳥衝烟去殘霞壓岸飛村醪無處得空對月光輝

落索河有感

百折波濤險一泓山澗清天高雲黯淡巖老石崢嶸古
洞都成穴諸峰盡築城版圖猶蜀界風土半秦聲杜宇
啼方歇銅駝歎未傾旌幢連赤縣烽火到神京嫠婦徒
存恤羣臣孰請纓傷予才略淺深媿李西平

姚思孝一首

思孝字永言江都人崇禎戊辰進士改庶吉士
授戶科給事中歷兵工二科謫江西布政司照

唐稍遷南國子助教升南太僕寺丞轉光祿少卿再轉大理少卿

康山

康山一簣草萋萋無復豪華似許西猶有揚州舊時月
翠禽飛上玉梅啼

葛徵奇

三首

徵奇字無奇海寧人崇禎戊辰進士除中書舍人選授湖廣道御史升太僕寺卿轉光祿卿有

蕪園集

詩話光祿樂志林園又得閨人
唱和格雖未高亦自超超拔俗

晚眺隅園

三月十日雨薄霧花濛濛小大澗壑鳴百道源相通潭
魚躍新水園竹抽春叢禽鳥忽變聲迺知天氣融登高
一以眺澄覽衆慮空玄理羣所貴耳目悅且充於焉坐
垂釣自擬滄浪翁

武林留別吳梅里

昨喜逢初地蘭缸夜雨紅故人相爾汝今日又西東
楓落前山樹蘋開別墅風小窓涼月靜客夢與誰同

題畫芙蓉

秋來烟水多蘆葦渺難即愛此江上花日坐雙鸕鷀

吳載鰲一首

載鰲字大車晉江籍宜黃人崇禎戊辰進士除
澄海知縣謫浙江按察使照磨升金華推官入
為戶部主事歷員外郎中轉廣東按察副使改

授翰林院侍講

姜給諫以五羊石見貽賦謝

文饒平泉莊有石自言好何如初平羊眠雲噉瑤草

李奇玉 三首

奇玉字元美嘉善人天啓壬戌會試中式崇禎

戊辰進士選武學教授遷國子博士歷南京工

部主事改兵部員外由郎中出知寧國府有雪

園遺草

潭柘寺讀書

讀書潭柘嶺身在白雲裏開軒豁遠眸風瀑洗心耳古
木挂青蛇云是二龍子下方鐘磬餘僧寮各棲止山童
剔殘燈掃葉烹泉水闐然羣籟寂明月射窓几

過京口

蕭條書劍下關河芳草萋萋客裏過原上鶯花三月暮
天涯愁病一身多海門帆影移青嶂山寺鐘聲到綠蘿
入望自知鄉國近那堪斜日聽漁歌

山居

方花礎潤氣氤氳靜對薰爐柏子焚夜半雨聲新水漲
枕邊流出一溪雲

顏俊彥 一首

俊彥字開美桐鄉人崇禎戊辰進士授廣州推
官被劾再補松江推官有仕隱集

村居雜興

病卧經旬滿面埃梅花落盡杏花開畫梁無數空巢在

社雨蕭蕭燕不來

龔士驤 一首

士驤字季良義烏人崇禎戊辰進士溧水知縣

惜取

惜取檐前葉休教落地輕夜窻留聽雨葉葉是秋聲

萬壽祺 二首

壽祺字年少徐州人崇禎庚午舉人有隰西草

堂集

詩話年少多才多藝詩亦
清逸無努目掀髯之狀

憶錢大

忽憶南徐道春風樓上年晚鶯移浦樹苦葉秀沙田驛
路歸人少蛟門落照懸如何問津者五載滯江船

入沛宮

泗亭春盡樹婆娑漢帝宸游不再過魂魄有時還至沛
樓臺落日半臨河風吹大澤龍蛇近天入平沙鴈鷺多
我亦遠隨黃綺去東山重唱采芝歌

魏冲三首

冲字道用常熟人崇禎庚午舉人有小碎集

采蓮曲

北渚采菱歸前溪采蓮去無端墮玉釵記在迴舟處

元日

年年悲作客今日賦閒居春草生新夢山花滿舊廬畏人書謝病示儉食從蔬問字吾何有無勞長者車

春晚

梅葉初齊梅子勻
新榆穉柳暗通津
春深莫惜餘花盡
却喜黃鸝不露身

陸

坦二首

坦字履長蘇州嘉定人
崇禎庚午舉人銓授南
豐知縣不赴隱居鄧尉山
有庚除詩稿

和姚修民簡寄

世逐浮雲換身同
落葉輕難忘百年恨
誰殉一朝名去
國懷公子憂時過
賈生江臯無限淚
日暮不勝情

春夜雪

春雨聲聲入夢闌
暗窓風動曉燈殘
濕雲壓竹鳥驚墮
起看空堦一片寒

徐柏齡

三首

柏齡字節之嘉興人
崇禎庚午舉人署永嘉儒

學教諭

詩話孝廉湖海播遷
詩不由人自出杼軸

春日

風聲起松末窈若萬壑深誰謂市井喧遂無天地心可
惜天桃花不言萎空林明年縱復開顏色不如今

壽寧逢艾千子

白日黯無色城門掩半開故人何地別間道此時來鄉
夢遠難寄官程近莫催江關庾開府詞賦不勝哀

江心寺文信國祠

孤嶼浮江面寒潮撼石根遙遙箕尾外何處可招魂

吳太冲一首

太冲字默真錢塘人崇禎辛未進士改庶吉士
授檢討升右中允有息心窩詩集

朱美之攜酒過

綠陰叢裏放玫瑰石几相延坐碧苔
百里雙鉗春酒釀
一年幾個故人來
廚丁細切溪頭筍
穉子貪爭屋角梅
信道朱游能折鹿
譚經且喜得相陪

姜 琛 八首

琛字如農萊陽人崇禎辛未進士除密雲知縣

改儀真入為禮部主事選授禮科給事中以言

事廷杖削籍戍宣城有敬亭集

黃九烟云先生詩發乎性情本

乎忠孝名實交孚纏絲盡致錢幼光云先生詩大抵取法于柴桑浣花其志同其調不覺其

也同

詩話廷杖與東西廠錦衣衛鎮撫司獄用刑之酷前代未有自王振亂政鞭撻朝士大臣有枷項者迫成化中汪直用事廷杖臺省臣王濬李俊等五十六人正德間以諫南巡杖舒芬黃鵬等百三十人死者十一人嘉靖初以爭大禮哭左順門杖豐熙等百三十四人死者十七人此其最甚者矣萬曆六年論首輔張居正奪情杖趙用賢沈思孝鄒元標等五人後定陵頗厭建

言諸臣疏多留中廷杖寢不用至天啓四年太
監王體乾奉勅大審復開其端重笞戚臣李承
恩以悅魏忠賢於是主事萬燝御史吳裕中相
繼斃杖下而許顯純田爾耕輩煩刑以逞備極
慘毒楊左諸君子之禍有不忍言者矣思陵即
昨雪消見現用獄稍平不意嘉魚熊公暨萊陽
姜公論列柄臣時日輻輳逆鱗既觸天怒莫回
拷掠之慘洵九死而一生者蓋至柄臣自裁而
兩公之荷戈終未見釋姜公臨沒語其子安節
實節曰敬亭吾戍所也戍者吾君所命吾未聞
後命而君亡吾猶罪人也死必埋吾戍所乃葬
宣城公晚歲始為詩風格一本杜陵其自序云
託哀鳴于異鳥感音節于
候蟲可謂善於喻物者也

秋懷

仰視雲中鴈飛鳴何翩翩朔風自北來玉塞起塵烟昔
聞漢武帝防秋守九邊拓疆猶未已奄忽下重泉哀哉
重泉下玄狐陟其巔大江萬里長下有蛟龍淵回頭夜
怒號聲怪震百川我欲往從之褰衣不得前願言長相
憶中心淚漣漣

和陶輓歌辭哭左侍郎仲及

大風自北來寒木正蕭蕭多少舊墳墓不知在何郊獨
君三尺土高山共嶢嶢我來拜君墓手折白楊條所取

非楊條荅贈在今朝君死則已矣我生可奈何我豈貪
生流母老強還家既為君作傳又為君輓歌生則託金
蘭死當告山阿

登使東歸

城南薄田十八塍高者桑柘低稌秔白日黃狐牆頭立

既不殺之當與揖

曾青藜
云鼻兀

簡余寒鐵

自我不見余秀才夏云徂矣秋風來我今一別秀才宅

堂前堂後生蒿萊丈夫骯髒只如此誓欲破家去鄉里
今日路傍一匹夫當時萬言干天子低頭俛眉心不辭
養雞牧豕身應爾君今讀書停雲館仰天狂歌何衍衍
有時野老扶杖過烹葵摘果酒先煥白公隄上波欲沒
期君同看溪雲滿

赴戍宣州衛

垂死承恩譴天威咫尺間荷戈荒徼去收骨瘴江還袞
職猶思補龍顏竟絕攀橋陵千滴淚獨在敬亭山

鑒江雜詠

老去人猶在春來客未旋側身天地外卜宅水雲邊月
照歸栖鳥江喧出口船苦遭生意短白髮不相憐

九日登越州稷山和弟孩

萬木凋霜嶺千巖帶水村雲屯山郭靜潮過海門昏阜
帽風堪落黃花酒正溫愁聞江徼外鳴鏑滿中原

送林衡者還嘉善

相知不在久岐路莫頻驚客舍由拳地鄉心夾漈城霜

前孤鴈白雨後一湖明為報余生札平安問舊京

周

燦

三首

燦字光甫吳江人崇禎辛未進士知宣化會稽

二縣選授浙江道御史有澤畔吟

陳皇士云侍御詩彬彬有

序大雅之音

丹青引贈顧子

山莫畫泰山松松樹已受秦皇封水莫畫黃河潦河流
已非夏后道但作清溪竹樹灣添我垂釣於其間吁嗟

乎男兒少壯隨朝彥豈料中年桑海變枉想丹青麟閣
中他人為我開生面顧生顧生爾莫嗔傳神似爾畫逼
真如何貌此尋常人

韓蘄王碑

西湖湖曲騎驢翁中興十將稱最雄道逢奸相但長揖
斯人豈比張魏公鄂王英武庶其匹時危協力扶王室
龍王廟前金鼓震遺恨書生黨元術公之骨埋荒墳公
之烈存碑文革堂鐵券雖已失千載猶傳趙雄筆

徐雷
發云

辭不多而激昂流轉斯人豈比
張魏公一語足慰斯王於泉下

鄰翁邀食五月桃戲作

桃實纍纍也足豪主人笑指玉盤高
仙家一熟三千歲
五月先嘗遜我曹

許
豸
一首

豸字玉斧候官人崇禎辛未進士除戶部主事
歷員外郎出為浙江按察僉事以參議提督學
政有春及堂詩

建州逢陳德輝

已分別離久何期此地同
西城山路近南浦野橋通信
宿情何極他鄉歲欲終
維舟無限意相對有飛鴻

送友之瓊州

匹馬珠厓路須防瘴嶺雲
蠻童青箬笠黎女綠蕉裙
潮有東西候時占朔望
分臨岐還把臂不敢說離羣

春日送客

春光初荏苒客路惜分攜
露濕鶯花重風吹燕麥齊
孤

燈茅店裏殘月柳橋西別思千峰外猿聲不住啼

黃坤五云

玉斧五律聲調委婉趣味澄幽
誦之如流水平橋佳趣自在

張鳳翥一首

鳳翥字儀明一字威赤宿松人崇禎辛未進士

除嘉興知縣補仁壽升刑部主事歷湖廣按察

副使

詩話張公牽絲作宰以慈得民晚節禦侮危疆
吮血裹瘡接戰而死忠勇不可及也詩又安雅
絕無叫囂之氣

武陵道中

孤城臨古渡斜日一舟橫北渚離人目西風遠客程
藤疎知樹冷櫂響信江平不用分漁火前洲月已生

于穎一首

穎字長公金壇人崇禎辛未進士除工部主事
歷員外郎出知西安府削籍尋復工部郎中知
順德紹興二府升浙江按察副使分巡寧紹道
新歲次茂貽韻

不覺流光度霜華入鬢邊難忘惟舊雨相對又新年學
佛寧遺世為農敢問天椒花一相勸身世各悽然

管正傳一首

正傳字元心長洲人崇禎辛未進士除永新知
縣調贛縣有積書巖詩草

詩話元心詩思入微原本易林太玄當其意匠
經營幾欲效修羅遁跡藕絲中然猶取材於古
故方之徐元歎張草
臣諸子較勝一籌

西泠橋

斷嶺寒烟落晚霞
閒聽漁鼓傍橋槎
誰知湖上彎彎月
又照錢塘蘇小家

薛 案一首

案字諧孟武進人
崇禎辛未進士
選武學教授
升國子助教
轉南刑部主事
歷郎中出知開封
府晚為僧號米堆和尚

金陵

野曠風鳶捷江空石燕輕
年年春草綠不忍上臺城

成仲龍一首

仲龍字為霖長垣人崇禎辛未進士除夏邑知縣調永城選授兵科給事中出為浙江按察僉事轉參議遷陝西參政歷布政使有東壁樓集

除日立春

除日今朝是蹉跎又一年歲從燈下改春訝厯頭先柏酒愁無分柴門靜可憐半生成底事兩鬢已皤然

劉應迪一首

應迪字簡在金谿人崇禎辛未進士閬中知縣

曉起

曉色漸熹微
析聲聽漸稀
月潛銷客袂
燈已失林扉
竹外風翻冷
花間露欲晞
巢烏棲未穩
先上女牆飛

王 斤 二首

斤字王屋蘭陽人崇禎辛未進士滋陽知縣有

王王屋集

詩話王屋嗜奇鞭驅險句觀其起釁宗藩自理
一疏辭艱晦而不舒在納言難以封進乃以未

將金幣自尤尤
人得毋過與

謫歸曉經中山

長安日以遠古道風淒淒草濕蛩聲緩林深鵲起低殘
兵親廢壘孤客度危蹊去國莫悲戀一枝不借栖

病卧聞砧

白露蒹葭老西風梨棗肥可憐人病卧翻羨鳥高飛藥
竈縈秋草藜牀帶落暉那堪砧杵急盡力擣寒衣

陳宗之

八首

宗之字玉立長洲人崇禎癸酉舉人

詩話啓禎間景陵流沝盛行於吳中雖有林若撫力持唐調然而捷敏未免率易玉立矜鍊獨操止始之音八門七壇六十坊可以獨步

世化

往聞漫翁言日月化豺虎斯語恐未然含疑不輕吐及乎遭世喪所遇賊聽覩中原延寇氛蕩析無寧宇菰蘆一方地荒疫亦愁苦天高吏肆酷法密民罹苦人鬼須臾間牽率歸黃土安得山阿栖飲泉采芳杜緬懷盛年

時邈若義皇古

漢道

漢道昔云季四海沸羣雄賢士失綱維奔竄投西東管
寧栖遼海田疇隱無終鄭玄與王粲各自獲所從如何
盛明世栖栖泥淖中雨雪積荒塗渚田路不通寧無北
門歎要自秉固窮疾耕寡樂郊仕宦乏奇功乾坤雖浩
廣無隙置薄躬愴惻衡門下憂來溯悲風

悔

硯田不可耕濁水不可釣常思汗漫游高卧青山嶠此
意更莫酬蹉跎失年少讀書近浮名趨俗失要妙幽幽
寒溪側寂寂孤燈照故牀擁敝裘密雪陷爐鉋兒飢每
索錢愁來獨悲嘯

登翁漢津水臺

朝卧采山堂暮登漁山閣漁采俱在山始信湖中樂閣
盡有高臺岑堯出寥廓茫茫笠澤帆隱隱浮屠峒峰秀
無匿覽波光恣開拓始冬似佳秋風日猶晶灼古樹儼

當階黃葉深未落葛翁不可招丹竈安所託空餘泛宅
游未踐褰裳諾宿契必有期無怨猿與鶴

游金菴

放櫂非有期泛觀湖中山偶然入幽境遂叩高峰關老
衲出肅客蒼顏映丹顏同坐絕壁下始知身世閒飯我
青精香供我綠菊斑葑山觜已沒金菴徑可攀歸塗歷
清溪荒寂幾灣環萬堆黃葉中清磬激潺潺月出每孤
往又逐漁舟還

病橘

病橘含辛實淒然墮曉風本無雕飾分敢恨託根窮斷
續陰依井低昂鳥啄蟲可憐冰雪後剩有一枝紅

周青士云

蒼老
工緻

感時

花石網看艮岳移麝香裙冷護宮衣紅燈小隊湖游夜
知否襄陽六載圍

寄衣曲

前庭踏鞠後庭歌主將功高意氣多不信沙場征戰苦
年年擣練寄金河

秋山即事

宋朝自召种明逸漢室何知鄭子真今日徵君何草草
馬蹄手板拜紅塵

李天植

五首

天植字因仲平湖人崇禎癸酉舉人晚更名確
字潛夫隱居龍湫山有蜃園山游諸集

陸次友
云因仲

高蹈詩多激逸合
乎清江碧嶂之音

詠史

秦皇制六合焚書築長城萬古以為罪孰為原其情典
籍付煨燼大易道獨行豈識理數原尚留天地精紫塞
亘萬里外內界則明春秋重此義茲尚存典刑後世經
術儒勦說日以橫胡然南面尊不恥城下盟祖龍而有
知其氣殊未平

雪夜泊舟許墅

朔雪沉宵柝江關卧未安
牕虛得疎響舟重壓新寒
梅落倡樓笛蘆垂釣子灘
鄰航催曉發得共月華看

游青蓮寺

香刹從來古春風客到稀
溪光平入座竹色冷侵衣
地僻鳥無語林深花自飛
相過逢勝侶並坐話清機

獻生賦謝隣叟

瓜蔬吾所愛分惠媿芳鄰
不忍私佳種還期及令辰
青囊珍重意白髮老成人
生計憐余薄時來話苦辛

山中訪宋爾垣

風吹帆影過西城一片浮雲嶺上晴滿地落紅多不掃

萬松臺畔讀書聲

謝 遜 二首

遜字彙先宜興人崇禎癸酉舉人有是亦樓存

稿

詩話孝廉晦迹衡門種菜一畦不入城府陳檢討其年寄懷詩云半畝牛宮繞菜田鉏畦汲水獨悠然芒屨一輛千金直不踏城中二十年其詩頗效林逋魏野

銅官山書齋

坐卧深林裏，牕開別一天。
山腰埋宿雨，石面瀉流泉。
路盡雲猶觸，村分樹尚連。
烟霞吾所戀，只此可忘年。

河間道中

猶復驅車去，行蹤何處留。
閭閻移馬廐，市井割鴻溝。
草濕王孫淚，塵淹季子裘。
那堪鬼車鳥，風雨夜啾啾。

陶汝鼎

四首

汝鼎字仲調，一字燮友，長沙人。崇禎癸酉舉人。

有榮木堂集

詩話先生壯歲好游自吳入越與先人訂僑札
之分嘗留橋李度歲晚際此離出監軍事捍禦
鄉邦著力暨章堵兩公盡瘁略同讀哀湖南賦
懷戾過於蘭成詩雖未脫景陵之派然覺爽氣
殊倫

京山道中探觀音巖尋磴掬水歷巖上下古木峭

壁高瀑競響舊有李本寧先生園今廢愜然有作

層巖近大道其麓如深村僧包立樹下過橋知寺門庭
前雙老榦一為娑羅根虛閣覆巖壁滿屋蛟螭痕飛流

響石罅奮躍探其源涓涓出漢尾色白河崑崙掬飲泉
上下微覺分清溫巖阿受夕陽偶坐如朝暾戀賞勿忍
去出溪松路昏惜哉平泉後亦不理茲園

金正希招集練江醉宿清淨寺

冬霜萬壑松江永日將夕畫舫泛容與川暝光愈白急
風吹燭花谷響合歌拍小榼僧廚來蔬笋界方格語笑
酒易傾如以桐叩石柱史如枯禪城市無一宅酒深思
啜茗同作虎溪客貝葉啓禪書梅花落瑤席坐久聞妙

香一榻隨所擇睡鄉鐘鼓鳴林鳥翻旅翮吾亦步下山
佛燈猶照壁

嚴州道中

曲江流不盡寒氣凜初嚴野泊分漁艇遙帆類酒帘枯
河冬雨活濕壁凍雲黏不分多歸思蕭蕭與夢添

哭亡弟鼎幼調

孝友人皆見居家母最憐不留娛白髮非意及黃泉鳩
杖難消噎驪珠易返淵老兄千斛淚不敢墮親前

陸清源 一首

清源字嗣白平湖人崇禎甲戌進士除增城知縣擢雲南道御史巡按福建後為馬士英部將趙體元所殺

答黃石齋先生

問俗停車到海湄羽書詎敢計安危孤城吹笛思當日
中夜聞雞豈異時北望烽烟勞夢遠東瞻林墅出山遲
蒼生極目堪流涕何日綸巾一視師

吳本泰 二十一首

本泰字美子一字藥師仁和人崇禎甲戌進士
除行人選授吏部主事改南京禮部歷郎中有
海粟堂集秋舫箋北游西征東瞻南還嶽游諸

草

周青士云吏部五古出入選
唐竹枝宛轉猶存老鐵遺響

詩話吏部當正聲微茫之日獨操大雅之音而
揚屹風雅者或不及焉益信曲高者和彌寡也

帝京篇

崇禎元
年作

夢想黃金臺來歌白石粲明明聖人出旭日天方旦廣

殿飭梓材神霄聳輪奐薇垣格澤消芝蓋卿雲縵三吳
罷機杼九廟秉珪璫下國頌時雍至尊理宵旰旰懷
殷憂邊籌寢弛旣軍需飛檄催水衡仰屋歎大姦已距
脫羣疑未永泮漸鴻雖可儀羔羊不聞讚名盛實則衰
事倍功乃半因之勅幾康匪伊游泮與君旣勤晝接臣
當思日贊朝中去朋黨政府參謀斷網必挈其綱繩先
理其亂求治毋太速防微勿滋蔓所期日月光幽遐理

必貫

朱近修云通
篇沉著不浮

靜海道中大風

海人行海國謂應狎波濤波濤泚不見曠野天風號寒
日澹無光動地卷白茅疑有鐵騎驅礮突鳴弓刀離羣
慘孤鴻失木傷哀猱巾車紛欲裂簸蕩如輕舠四射中
肌膚一寒欺復陶豈闕造物意人事或偶遭方驚萬里
輶寧憚險與勞

任丘張氏園藍田先生授經處

不識魚君陂幸識魚君令城隅敞臺榭水木相翳映謂

予此棲遲差可閒眺聽是時秋氣深白露漸蘭徑瘦石
裏苔斑寒花棲蜨暝女牆邏柝喧梵閣宵鐘應慮澹羣
物輕時危百憂并皎皎明月枝驚烏棲不定茗牕靜披
覽冥緬獨無竟昔賢曾授經履屐痕猶賸

臨淮道中雪

昨日春風暄僕夫俱喘汗今晨北風厲雪花卷行慢天
時自迴薄人意驚錯換况乃事徂征惻惻羈魂斷長淮
望不極鍾離道方半踉蹌赴郵程渺瀰惑阡畔暝鴉寒

不呼翻飛忽零亂車上冰滿髭車下泥沒髀紅燭映深
簾寧知旅人歎

陋巷井

改邑不改井泠泠無古今原泉何方來或是泰山岑仰
之既彌高俯之亦彌深屢空其庶而澹然助齋心仲尼
飯疏飲應與共酌斟禹稷憂飢溺易地同所任至味無
異旨樂哉此中尋

秋雨歎

晨雞喔喔天未明
漬垣忽作崩雷聲
裳衣顛倒書帙亂
蒼茫四顧心獨驚
陰崖潭水深千尺
飢蛟掉尾盤渦黑
我欲拔劍往斬之
出戶踟躕三歎息

賦得草徑入荒園

匝地蘼蕪綠戎戎
接短垣路迂隨鹿引
村靜覺禽喧
泣露沾芒屨
頽陽卧瓦罇
園丁渾解事
野藪具盤餐

秋住湖口

雨夜官城暗
霜期候鴈呼
瘦筇黃葉寺
高枕白雲湖
歲

月傷羈客烟波狎釣徒醉吟楓落句秋思滿東吳

冬日村居

短景催年盡荒齋擁膝安甘蕉經雨敗叢菊抱霜乾閉
戶腰肢健千人齒頰難得閒能幾日杯勺此盤桓

候舟

浦口千檣集占風信宿遲長雲鴻沒影古壘樹無枝人
語殊方雜客心孤月知湯湯濁河水利涉問舟師

阿城逢秋

野棗青未熟渚蓮紅欲銷涼風髣髴鵲頂新水長魚苗江
上客星小亂餘兵氣驕秋來無別夢長畔鹿門樵

由歙邑入海陽

淺瀨無舟渡迴溪有路通獨行過市上元只在山中薺
麥搖晴綠林蕉逗晚紅清鐘隔巖寺留憩聽松風

庚申中秋

叢桂生陰雨氣涼少焉月出四山蒼于飛鵲繞樹三匝
所謂人居水一方素瀉紅菱秋饌美畫船烏榜怨歌長

徘徊顧兔傷流景爭乞雲英玉杵霜

任城將南還半舫先生餉酒走筆言謝

李白樓前黃葉洲欲發不發仍淹留青氈近對許主簿
白衣恰送王江州五侯掉頭那肯顧一杯入手百不憂
讀公新詩飲公酒醉眠松石風颼颼

寒食感事

南朔城荒春到稀西山雪盡尚沾衣別來桃李三年夢
老去兵戈萬事非行腳出家猶有累低眉獻賦不如歸

試看絲上神林近野爨無烟空淚揮

西湖竹枝詞

五首

西湖湖水碧琉璃西湖楊柳綠茸絲愛殺桃花紅片片

却似西施好面皮

繆天自云此用唐人
迴波樂辭不為麤也

與郎暗約段橋西早起妝樓欲下梯宿雨半收晴不穩
惱人最是鶉鳩啼

薺麥青青三月三看看草色暗湖南忙催姊妹燒香去

戴勝來時又養蠶

放生池岸柳叢叢香閣鈴旂四面風輕薄少年乘醉過
手提射鴨竹枝弓

踏青湖上嬾歸家更愛山行輦路賒
妾上笨車郎跨蹇
西溪十八里梅花

春曉

南來消息斷歸鴻江國迷春曉夢中斜帶參星杏花白
依稀牆半宋家東

凌世韶 一首

世韶字官球歙人崇禎甲戌進士除寧化知縣

謫江西按察使簡較改興化府經歷升處州

一作

嚴州府推官入為戶部主事有內沙集

陳皇士云
內沙廉吏

晚棄家隱黃
山詩有清韻

惠州西湖

湖面寒光一鏡平
露荷烟草入秋清
白鷗浴罷各飛去

遙見潮痕郭外生

周之璣

四首

之璵字玉見長洲人崇禎甲戌進士除刑部主
事歷禮部員外郎

讀史感懷

石羊埋棘漆燈冥

一作
焚

短犢橫牽上廢亭金盃更從何

處覓春深杜宇哭冬青

詩話玉見讀史感懷六十首援
古驗今不失國風小雅之旨

漢皇恭儉百無營衡石投籤久勵精端為黼宸求治速
翻教安石誤蒼生

寶帶橫鞵建碧油居然鞦韆閣東牛未聞奏捷傳淝水
又見稱兵犯石頭

參軍空自賦蕪城一歲人間草一青隴首寒雲常漠漠
風蒲依舊滿臨平

劉侗 二首

侗字同人麻城人崇禎甲戌進士除吳縣知縣

未任卒

曹潔躬云同人以文體矜奇為學使置下等憤懣入太學連舉鄉會試留都亭

日與于司直共輯帝京景物畧文筆詭異蓋亦服習竟陵流派者

賽社祠

春社典春衣秋社饜梁肉婦子且莫嘻場熟廩不熟遼
陽方告警農助官家穀遼租十增三官租三增六里胥
登門催斛半量一斛益以雀鼠耗完數恒不足賽社報
年豐社神聽我祝但願邊惠平強於倉儲蓄神保太息
言遼平爾何福糧隨遼餉加不隨遼餉復播州幾月兵
至今農噉粥

久遊復至鄂得家信將別黃宗之

出門未暑秋仍滯十度曾登送別舟久客畏聞家有信
逢人俱道邑無收衣糧不恥因良友僮僕多言怨漫遊
夜夜酒同鄉夢醒舍邊雞與渚邊鷗

陳組綬 一首

組綬字伯玉武進人崇禎甲戌進士除兵部主
事有伊菴稿

舟泊清河有攜絃索過飲者

客思紛河北商絃復漢南星光零夕霧村柝靜虛潭去

國黃花九逢人白社三曾為記歌者不醉亦何堪

朱芾煌 五首

芾煌字玉璫無為州人崇禎甲戌進士除餘姚知縣調樂安入為戶部主事謫補順天儒學教授稍遷國子監博士升車駕主事歷武選郎中

有文嘻堂詩集

宋牧仲云武選樂府學長吉間出文昌玉溪間古詩近體出入

三唐要多自得能不牽於習尚尤展成云武選詩思深而志遠徐電發云武選紀事之作和而不流哀而不激七律尤稱擅場

獨步文德橋

畫樓高閣不同登，雀舫鵝笙亦自憎。
每日杖藜橋上立，青青雨過看鍾陵。

北行江上阻風

荻港黃雲壓水流，風翻白浪打船頭。
長年莫道秋江冷，楊柳堤南是酒樓。

示從行汪伶

歌行作使得何戡，尚與殷勤佐酒酣。
我有傷心千種恨，

鷓鴣切莫唱江南

與客飲感舊

檀板牙牌事事新
小車花下自相親
勸君莫惜花前醉
舊醉花前幾人

雜吟

賽社人稀古廟冬
午烟晴裊酒旗風
游人不盡春游興
醉帽歌斜落日中

王 潢 一首

黃字元倬上元人崇禎丙子舉人有南陔集

九

烟云元倬詩沉雄渾鬱頓挫瀏離大都發源於
騷雅徵材於漢魏歸根於杜陵薛諧孟云元
倬忠孝之性溢於毫楮纏綿悽惻而未已顧
寧人云先生詩深以婉和而摯不失三百篇溫
柔敦厚之旨方爾止云元倬格律森
嚴用意深至雖憤時嫉俗而渾然不覺

宿松風閣分韻得吟字

靄靄歲云暮風雨恒見侵小霽憩山閣蕭颯吹寒霖澗
壑亂餘響鐘鼓沈清音蒼蚪卧蜿蜒擎攬力不任羽觴
亦以歇剪燭聞鳴琴嘿坐得冥會擁褐成孤吟須臾微

霰集晨起雪在林樵徑斷人語四野號飢禽皎皎二三
子貞白同松心炎暉諒可俟見睨消重陰

徐之瑞

七首

之瑞字蘭生臨安人崇禎丙子舉人有橫秋堂稿

詩話孝廉熟精文選五言古致
紛數近體效韓冬郎極其綺麗

行路難

太行北上雪刺天黃河西渡冰塞川狗屠擊筑各已老
咸陽逐客還游燕烏丸夜破龍盧戍越鳥朝棲日南樹

長槍大槊取通侯安用葷門事章句

雞鳴嶺

披榛陟山椒輒摧馬盤桓歷險未云疲逶迤入雲端仰
探巖谷偏俯視井邑殘千峰列遠戍兩崖壯重關垂蘿
蔓幽壑怪松支危垣灌木鬱蕭慘哀風嘯叢雀乘墉或
失恃務德誠所難蟋蟀在牀下我生詎遑安勞勞多苦
辛惻惻起悲歎

五十初度戲作一萬八千日歌

翔烏夾日東方起螭蛄大笑蜉蝣死聽我萬八千日歌
請從握算軒轅始我生不逢唐與虞我死不返鴻濛初
以尻為輪神為馬手抉灝氣還虛無虎頭燕領玉關路
墮地儒冠脫相誤將軍海外御樓船坐看蚩尤蔽妖霧
漩題兩角開明堂左日右月魁中央豐隆屏翳伏不動
弧矢一星猶射狼布衣憔悴夷門客瞋目操椎大梁陌
少年躍馬氣凌雲怒血衝冠髮先白南修蛇北封狐魂
乎歸來不可處上乘白蜺游天都洞房繚繞明華燭珠

綴文軒網交綠娛光絲眇睇層波半醉雙鬟抱絲竹北
斗挹漿醪且清玉妃起舞吹鸞笙百壺一榼馬足算小
臣再拜觴千齡天門朝開誅蕩蕩劍佩雞鳴劇相向已
看恨骨委蓬蒿安用黃金鑄形像二十四氣黃鐘吹三
萬六千璇璣推元化回環貫金石丹宮玉齒生寒灰平
生豪健屠龍手蹭蹬麒麟落牛後夢中滄海幾回更勸
爾長星一杯酒

春游詞

四首

西山松柏翠成林十里橫塘水路深
鷗鷺鴛鴦莫相妬
荷花香處結同心

檀槽低攏小鸞青金鴈斜飛玉手輕
弟子三吳零落盡
橋頭絃索最知名

山頭擊鼓賽金錢檣上飛鳥散舞筵長
記迎神送神處
石湖沙
簪泊郎船

龍膏千炬繞芝楹銀鑰初收玉漏輕
夜冷不禁羅袖薄
雙鬟炙火更吹笙

巢鳴盛一首

鳴盛字端明嘉興人崇禎丙子舉人有永思草

堂集

詩話孝廉肥遯深林絕迹城市時羣盜四起鏐
鐵銀鏤之器無得留者於是繞屋種匏小大凡
十餘種長如鶴頸纖若蜂腰杯杓之外室中所
需器皿莫非匏者遠邇爭倣之槁李匏樽不踰
而走海內孝廉作長歌咏焉茲錄
五言一律剖心刮垢蓋自喻也

題匏杯

回也資瓢飲悠然見古風剖心香自發刮垢力須攻不

識金銀器何知陶冶工
尼丘疏水意樂亦在其中

劉永錫 二首

永錫字欽爾魏縣人崇禎丙子舉人選長洲儒學教諭署崇明縣事庭無留獄有洹水遺詩

詩話洹水至性之士兵後隱居相城有大吏強之仕袒裼疾視曰我中原男子年二十渡漳河登大伾躍馬鳴鞘兩河豪傑誰不知我奈何欲見辱邪取壁上所挂劍欲自剄門下士抱持之得解既而女妻相繼餓死子為盜所傷亦死久之洹水沒其弟子徐晟陳三島等經紀其喪葬之虎丘山塘

楊子刺船歌

白日墮兮野茫茫家千里兮來遠方壯士何時兮歸故

鄉

鼓柁歌

逝彼中流兮采其荇矣思君與父兮有懷靡竟矣身為
餓夫兮天所命矣中心殷殷兮涕斯迸矣

明詩綜卷七十三

欽定四庫全書

集部

明詩綜卷七十四

五四

詳校官中書

臣

涂日煥

主事銜

臣

徐以坤覆勘

總校官降調編修

臣

倉聖脉

校對官庶吉士

臣

潘曾起

謄錄監生

臣

楊

恪

欽定四庫全書

明詩綜卷七十四

翰林院檢討朱彝尊編

王

留

一首

留字亦房吳人釋登子

淮北道中

沙灘高下浴鳬鷺
新出荻蒲綠未齊
移橋過淮應化松
種楊當路半生稊
船頭鼓角頻逢驛
河上金錢浪築隄

醉後無端千里夢直隨明月到深閨

茅維一首

維字孝若歸安人有菰園集

屠緯真云孝若天才絕高於體靡所

不合

陳仲醇云孝若詩韶秀清華絕無累句

暢

梅季豹云孝若陶鑄古人篇琢句磨情旨諧

早秋寄允兆

秋風難作客匹馬欲南歸隴塞黃雲合江淮紅葉稀
千戈愁獨卧鄉國夢全非已卜刀鐔約滄洲可拂衣

盧原一首

原字原甫南海人有五湖游草

甘露寺望金焦

北固山頭寺崔嵬瞰大江縱無甘露下應有毒龍降陳
迹羊為石新離燕入窗望來浮玉近遙對碧峰雙

卜舜年四首

舜年字孟碩吳江人嘉興縣學生有綠曉齋集

郊社迎神曲

旦旭兮曛矇神鴉起兮雲中沐予髮於蘭湯兮振予衣
於蕙風潔齋俟兮土公土公不來兮憂心忡忡

黃浦晚渡

殘照收黃浦孤舟何處依沙昏秋雁落潮滿夜漁歸薄
海山川曠前途廬舍稀帆輕天路近直與鶴俱飛

冬夜垂虹橋

卸馬垂虹畔深宵感慨增橋明霜正下江遠月初升吏
醉城無柝僧歸塔有燈王風京路阻欲詠媿無能

湖上送別

西風奮枯林潮沸盛湖晚淚眼對殘陽看君行漸遠

姚士舜

士舜字叔祥海鹽人國子監生有蒙古堂詩集

薛潤孃七夕生日

生逢烏鵲渡河秋乞巧今番免上樓莫訝眼邊多俗物

天孫亦祇嫁牽牛

張屈

二首

屈字醒公長沙人處士鄉里私謚貞節先生有

醒公詩集

邢孟貞云醒公詩高寒類孟東野幽渺過之讀之使人不懼金孝章云

醒公汲幽梯峻返之
冲澹希夷不可方物

山居懷金文裕

江光映林際纖月微微落冥冥靜夜鐘沈沈響深閣言
念君子交於道信不薄空谷常感懷終不我離索

弔古

弔古不疾哭欲哭聲已吞嘗瞻吾自苦對世不敢言中

夜望星斗失序何足論至人竭精力能使移崑崙夏月
落天霜方報君子恩

邵昇遠 一首

昇遠字子近松江華亭人

田家樂為陳孟言賦

香稻收花穗已齊幽棲渾似瀼東西萬竿修竹千叢菊
十角黃牛五母雞婦起炊糜朝出饁客來留榻夜分題
橙黃蟹紫新醕熟日日何妨醉似泥

沈弘之一首

弘之字茂之蘇州嘉定人有清溪草堂詩彙

李本

寧云茂之近體含蓄
不露得唐人之遺風

濟寧舟中望月憶家

野曠天連水登艫四望寬
家逾千里隔月詒兩回看客
裏光相對閨中影自寒
郵籤計程速定已夢長安

施武十三首

武字魯孫別字百靈長洲人崇禎間游于滇有

楚游草西覽篇

詩話魯孫孝子佯狂翫世善草書鄭孝廉士敬謂曰君書直逼二王不雜唐宋以下筆法魯孫大喜於同人廣坐中徧題箋扇呼士敬曰君頗知書吾書究誰似士敬謬曰今日書不見佳魯孫瞠目左右視擲筆而去嘗語人曰吾於詩極力摹擬古人僅可雜之王仲初集中耳今吳人罕有知之者處士金侃亦陶藏其橐經候官曹能始墨筆點定予亟錄十三首滇黔風景可得其大槩焉

烏雅關

朝上烏雅關暮下烏雅關老烏啼啞啞行人還未還

關索嶺

高嶺呼將軍將軍祀其上行人仰望時白雲隔千丈

相見坡

上坡面在山下坡山在面相見令人愁不如不相見

鳳羽詞

鳳羽
山名

鳳羽低連鄧睽川山頭流水屋邊田額尖新樣姑姑帽

五月羊皮帶汗穿

鄧睽詔名姑姑帽滇人以羊皮繫額寒暑皆披

街子詞

滇中以作市曰街子
逢辰亥戌未日為期

豬街纔罷又龍街
蠻女牽羊入市來
背上擔兒嘗慣負
胭脂落盡小桃開

土官出山詞

土官唯參謁官長始冠帶
居常但用阜綾青布裹頭

嗚嗚牛角滿山陂
腰下橫刀弩箭隨
雜部椎頭皆束帛

阜綾纏額長官司

煮鹽詞

滇中鹽井四唯黑白二
井課稅甚多餘不及焉

使君不及鬱林廡
舊例逡巡新例添
白井爭如黑井好
一斤水煮半斤鹽

出獵詞

秋高出獵草根枯漫縱韓盧不用呼新襲土官誇武健
側身馬上獲雙狐

歸化詞

滇中山茶天下第一唯歸化寺者其本合
抱花大如盂國初已前物也往來宦遊羈
客留別交好至
此莫不墮淚

鴛鴦夢斷綵樓空馬首蕭蕭故向東歸化寺前多少淚
年年三月蜀茶紅

麗江詞

麗江府即古笮國地也地寒五穀稀少惟
產良金毛布之類方伯用貢金必索其直

從來直指公皆不按其地聽之而已
人皆耳上貫環好衣紅與西域相類

麗江水繞雪山寒郡縣羈縻異國看千里羅步地名無貢

賦黃金有價不輸官

永昌詞

永昌古哀牢國也國初流配獨多吳人故語言風俗宛似南都為滇之首郡

漢武窮邊開永昌哀牢部落散丁當流人不學花蠻語
城郭風煙半建康

寶井詞

寶井在姚關萬里外非容易至販寶者止于緬中交易緬中多瘴癘除三冬與初春

通夷者不敢出

緬中花落滿蠻山千兩鴉青馬上還寒食雨飛防瘴癘

漢人不敢出姚關

鴉青寶名時適有是寶重一兩三錢價三十貫

賣雪詞

大理蒼山雪六月不化市上女郎賣之猶吳下之賣冰也

雙龍關裏百花香銀海逶迤抱點蒼六月街頭教賣雪
行人錯認是瓊漿

鄒 潏 二首

潏字中朗秀水人縣學生

江行望廬山作

亦知山有寺咫尺見雲封瀑布千尋水香爐何處峰向
晴微見樹卓午詎聞鐘來往驅塵事深悲負短筇

武陵

仙源應不記年華洞口今開幾樹花若使重來津可問
扁舟我亦願移家

卓人月 二首

人月字珂月仁和人貢生有蕊園集

詩話珂月才情橫溢所撰續千文
稊帖而奇肆詩亦不為格律所拘

泊烏鎮不寐作

逆風逼歸期
今夕寄淺港
月出人不知
閉戶若羸蚌
遠寺燈微明
未罷老僧講
良久喔喔聲
荒雞引其項

贈女鬟紅衣

石家醋醋喜
穿緋裏手擎觴
率意飛坐上
恨無姜石帚
長歌一曲惜
紅衣

華淑 三首

淑字聞修無錫人

雜詩

斲木為車其半為輪車自招搖輪何苦辛

洞庭西山

圓湖北滿月青山猶挂影晴陰網輕瀾深翠積遙嶺滌
洄柔櫓前如魚狎藻荇戀彼楓桺香丹黃點妍靚終期
宅此居一樓一舴艋舴艋石公遙樓當銷夏冷竹木待
襟裾烟霞開簿領

消夏灣

平湖添一曲風色遂全幽晴泛亦疑雨山居猶在舟橘
橙垂戶戶菱芡聚洲洲不信偏宜夏暄涼儘可游

林雲鳳 三首

雲鳳字若撫長洲人

詩話若撫當鍾譚猷張之日守正不回詩篇極
其繁富惜知者寥寥困阨終老相如遺草已不
可問矣

行路難

上客且莫餐聽歌行路難茹荼知味苦食梅知味酸蜜

中亦有螫棘中亦有蘭人情反覆君自看泣者未必感
笑者未必歡曲如羊腸鬱以盤令我喟然摧肺肝

韓淮陰廟

韓侯遺廟在過客不勝悲未請真王印先收大將旗功
忘百戰後恩報一餐時何似清淮上終身把釣絲

憂邊

絲綸閣下議東征為遣元戎出大明邊月曉懸弓劍影
朔風秋散鼓鼙聲滄溟萬里波臣國紫塞三千浪子兵

奏凱未聞糧援絕不知平壤幾時平

項真一首

真字不損秀水儒學生貢入國子監有西湖草

詩話不損以門才自豪兼綜今古文深為李長
蘅聞子將所賞有御史巡按至浙試士子文經
書發題外俾作一詩題是賦得多兩紅榴折不
損書法絕倫以行草縱筆寫之同學慮御史必
怒咸為不損危而御史竟拔置第一益自負儻
蕩不羈入修門生事瘕死于獄予嘗見其為閨
人銘梳奩曰人之有髮旦旦思理有身有心奚
不如是筆法極其飛舞繹其語殆亦非真狂生
也

社集分賦得竹林

入林非任達懷抱良有託把臂愜同志痛飲戀狂藥修
竹何蕭蕭微風籜已落故叢擢纖枝碧影墮杯勺盤桓
不能去嘯詠或間作管絃非所好況乃靈囂号仰視飛
鳥翔醉眼空寥廓契此考樂趣謝彼影纓縛寄語道旁
子沈冥與爾各

謝夢連

三首

夢連字孟草長洲人有遺詩

陳玉立云孟草詩
使事必穩標韻必

諧 金孝章云孟草遠絕時調
詩以自然為宗不失唐人風韻

送友人游天台

細雨薜蘿綠扁舟渡若邪
春流飛竹箭暮靄隔桃花
佞佛何妨酒游仙莫問家
儻憐人外癖分我赤城霞

治平寺寓友人攜酒見訪

吾友攜尊至開門黃葉深
斷雲孤岫冷斜日半湖陰
獨往無千古相期有寸心
行行難以別明月在長林

秋夜

木葉始微脫庭空陰薜蘿誰云秋氣慘我愛夜涼多林
逗纖纖月雲浮澹澹河坐深人境寂新鴈一聲過

何大成一首

大成字君立常熟人

抵夔州覓少陵草堂

成都草堂今若何且向西瀼飽經過亂山不斷烟雨色
匹馬時聽巴渝歌峽中長年布帆穩驛路官長油衣多
吳趨老人真好事貪訪遺蹟空蹉跎

邵濂一首

濂字茂齊常熟縣學生

馮已蒼云邵君詩清曠玄澹

雨

終日雨如絲連山芳草碧庭際孤雲屯遙村暮煙積野
渡行人稀圓沙一鷗白寂莫想晤言誰破蒼苔迹

屠應韶一首

應韶字韶甫秀水人有松吟草

贈歌童

弱質偏姚冶清歌意獨新未須聞別調梁上已飛塵

李翹
二首

翹字時實松江華亭人有樵雲居橐

感遇

幽蘭出深谷冰雪揚芬芳天桃得春風榮華耀朝陽萬
物各有時盛衰詎可量君子重制行通塞夫何傷對此
遲日嘉且進花前觴

寓言

松柏有蔦蘿生死共依附柔弱不自持垂垂百尺樹草木匪金石榮華寧久駐摧折非所期飄零更誰顧

丘遂一首

遂字叔遂嘉善人初為僧字凡可中年以口舌忤鄉里貴人反儒服補縣學生有丘叔遂詩草

江上雜詩

竹筏歸從柳外汀鷓鴣隊隊晚風腥漁師不避豆花雨翻脫蓑衣覆酒瓶

吳拭三首

拭字去塵休寧人有遺橐

徐武子云去塵慷慨重然諾中年以結客

傾其家晚栖吳市尋避兵虞山困厄死其詩自
出機杼決難泯沒朱子容云去塵夙饒于貲
破產結客贈予手製糜丸不啻沈珪對膠也客
金陵遍題十寺廊壁七言如花雨已過寒食後
風箏又傍社壇斜蠻鄉有夢三千里閩海無書
二十年半偈歲深香積飯一番春老木綿衣移
家轉近寒山寺探篋惟餘秋水篇衣上露涼
飄桺葉鬢邊霜重壓蘆花誦之神采溢目

苦寒

嚴霜摧百草北風何其涼我愁豈在躬憂此道路長忽

忽行役中不復知景光凝冰屬仲冬萬物咸閉藏吾非
寒號蟲乃思驕鳳凰躊躇三歎息落日照路旁

無題和斗生二首

海外雲生碧浪陰頽鱗蒼鴈總浮沈寥寥天漢雙星小
寂寂梨花一院深貞玉有光還易見明珠無定杳難尋
輕鷺欲繡愁無力除是靈芸七孔鍼

巫山遠在暮雲中愁隔春燈一點紅莫道金刀難翦水
須知紈扇也驚風化為蝴蝶飛纔竝除是鴛鴦睡不同

最是游絲無賴甚又牽春去過牆東

沈章 六首

章字宗玉嘉興人國子監生有苧莊集

詩話上舍為亡弟千里婦翁詩頗崛奇所居苧莊略約相通環以水竹余嘗讀書其地今其二子皆登鬼錄遺書莫可問矣

示弟連

逢蟲則有蛹蠶則有績矧伊人今胡不爾德

解一

昔我先人

實懋厥功靡不夙夜克績其宗

解二

伊余懷兮程是稼穡

一經不遺以永朝夕

解三

朝斯夕斯日月言邁令聞或忒

我心匪懈

解四

人亦有言聲類是求相彼蒼鷹氣化為鳩

解五

淵冰在前惕焉戾止繩墨在御敢以勗子

解六

淮陰侯祠

淮水十斛泥半石行人入門三歎息王孫功高天下疑
赤龍雌雉俱慙德前有渭水後桐廬進則不足退有餘
曷不歸釣城南魚

靈谷寺看梅

下馬看碑度孝陵山椒十里樹層層半開香氣清於水
一路人家靜似僧春動粉鬚都化蝶夜寒花片欲成冰
思憑一枕羅浮夢月白煙黃睡未能

岱宗次吳秋圃師韻

四十里程半日行下觀鄒魯井中耕樹從樵口標秦漢
人與繩籃託死生漂髮不知何處雨曝衣猶及上方晴
東風無力吹雲去抹斷齊州水一泓

隋隄懷古

邗溝新碧晚濤平楊柳曾遮殿脚行誰道雷塘歌吹歇
月明重按玉簫聲

天池寺

竊栗猿雛戲法幢天池中劈石門雙深山不是無燈火
解惜飛蛾夜觸牕

邵德生 二首

德生字大生平湖人崇禎中儒學生有清聞軒

橐

夜度清遠峽

枕上不見山但聞水聲駛自非山百尋水急那如此

楓亭

草樹隨方別楓亭故有楓故鄉烏臼樹霜色更深紅

陸壽國

一首

壽國字靈長長洲縣學生天卒鄉人私謚孝簡
子有嶺雲集

虎丘春步

好鳥語芳樹春山遠近看攀厓振蘿策度塔跨雲鞍縞
袖翔飛燕青箋賦木蘭雨餘客去後新月上欄干

吳道約一首

道約字博之一字亞侯桐城人縣學生有大易

山房橐

懷方子恒

王孫別去草萋萋江麓殘煙送馬蹄我念故人腸斷絕
小橋流水夕陽西

沈嗣貞 一首

嗣貞字紀常秀水縣學生有荀草堂集

譚梁生云紀常

諸體俱臻典雅

秋夜

適館聞衙鼓歸家聽寺鐘欲為僧苦寂未作吏先慵夜
永蘭膏減秋深玉露濃此中忘去住城市有高蹤

李肇亨

三首

肇亨字會嘉嘉興人太僕日華子有寫山樓率

圃夢餘諸草

詩話吾鄉鮮巖壑之勝然園亭之參錯水木之明瑟舟楫之沿洄縱游覽所如而不倦萬厯以來承平日久士大夫留意圖書討論藏弄以文會友對酒當歌駕湖之集譚梁生偕會嘉和之先後賦詩者三十人事未百年而閭閻故老已莫能舉其姓氏玉杯錦席之地皆化為宿草荒煙惟李氏寫山一樓尚未極飛粉落宛然靈光之在魯錄珂雪之作不禁慨然

秋興

溪樓閒眺望秋思滿林塘潦水次菇爛西風穠稈香晴光翻去鳥野色動寒蟬問詢東籬菊還須後夜霜

題宋人江泊圖

愛見江邊樹蕭疎落照前
遠峰分霽色小塢共寒烟
鴈迹留沙渚猿聲到客船
十年湖海夢今日倍依然

西泠寓室

露氣橫疎柳香風送晚荷
不知湖面闊止覺四山多

駱雲程 二首

雲程字天游一名雨禾字穉孫
嘉興人有廣禽

言

布穀

脫却破袴衣著新莫著故新人紈綺舊荆布貴易交富
易婦朝還朝暮還暮人生肯繫如匏瓠

鳳皇

節節足足雌鳴雄續不集于梧不集于竹栖棘斯危在
笄則辱雄兮雌兮何德之衰兮

譚貞和一首

貞和字閭仲嘉興人贈太僕卿昌言次子

社集分賦得金谷

日月長麗矚溪山餘素期別廬欣賞間更復賓主宜監
軍曠高懷祭酒澹塵思盤礴澗道上澗冽荇參差竹柏
既峭倩藥草復繁滋觥飛壘交錯絃急管威夷迢迢錦
步障晃晃珊瑚枝姬侍列雲屏倡舞喧相追豪侈極人
目俱言此會稀席終方奏序興往各稱詩遺韻珍當年
勝游示來茲不負歲寒約意氣歡足持

譚貞竝 一首

貞竑字立生貞和貞良之弟有清音閣詩草

南屏歸艇遇雨

望裏南宮潑墨山小牕殘燭放舟還從容畢竟輸漁父

藕葉菱花泊淺灣

秦徵蘭八首

徵蘭字楚芳常熟儒學生

徐大臨云近傳天啓宮詞百首乃琴川秦

秀才辭而同里陳稼穡為已作公然鍾板行之

詩話德陵實錄為黑頭爰立者所攫天啓四年七年事遂爾遺佚秦秀才宮詞拓撫禁庭瑣語

頗稱詳核第合而觀之嫌其述客魏
居多而事闕德陵者寡不無微憾耳

天啓宮詞

八首

紅粉排班玉輦旁西園花柳踏春陽中宮侍從偏無幾

窄袖高鬟一樣妝

自注張后性淡靜愛憎稍與衆異客氏教宮人效江南作廣袖低髻尤為

后所厭薄春秋佳日駕幸西苑等處坤寧宮侍從多不踰三四十輩其妝束如圖畫所見古人像客氏往往目之笑

石梁深處夜迷藏霧露溟濛護月光捉得御衣旋放手

名花飛出袖中香

自注乾清宮丹陛下有老虎洞不知所始洞背為御街洞中甃石成壁可

通往來上嘗于月夕率內侍賭迷藏為戲潛避其內諸
花香氣上所為愛時采一二種貯襟袖間故聖駕數武
外輒識之以
芳芬襲人也

內河環遶禁城邊疏鑿清瀾勝昔年好是南風吹薄暮

藕花香拂白鷗眠

自注神廟靜攝年久紫禁城內河壅
淤不通德陵復令疏浚之春夏之交

景物尤勝禽魚
菱藕儼若江南

聖主多能絕代姿罷朝常是運斤時裕妃笑指燈屏問

雕到寒梅第幾枝

自注裕妃未罹禍時宸眷獨寵上好
雕鏤木器護燈小屏八幅手刻寒雀

爭梅戲畀諸少璫今璫之仍諭以御製
之物價須一萬翌日如數奏進大悅

琉璃波面浴鷗鳬艇子飛來似畫圖認著君王親蕩漿

滿隄紅粉笑相呼

自注上數偕中官汎葉舟于西苑手操篙櫓去來便捷

美人眉黛月同彎侍駕登高薄暮還共訝洛陽橋下曲

年年聲遶兔兒山

自注兔兒山即旋磨臺乙丑登高聖駕臨幸鐘鼓司掌印官執板唱洛陽

橋記攢眉黛鎖不開一闕次年復如之宮人知書者相顧疑怪非特於景物無取語意實近不祥也不期月而逝矣

鼎湖龍

風掠輕舟霧不開錦鱗吹裂綵鰭推須臾一片歡聲動

捧出真龍水面來

自注乙丑端午駕幸西苑用綵繒飾小舟首尾為龍形上手持划具同少

瑞劉思源高永壽蕩漾橋北怪風忽起雲霧四塞
舟覆二瑞淪死管事譚敬旬赴救扶駕出水

水鴨銀苗院院同鵲橋衣卸巧山空晚涼供罷波羅蜜

去看河燈萬點紅

自注七夕節各宮立乞巧山子宮眷衣鵲橋補自初一起至十四止中元

節食銀苗菜藕之嫩芽也水鴨先一夕煮熟凝成膏者甜食房進供佛波羅蜜西苑作法事放河燈已上數條宮中舊例惟宮人內官深夜相攜看河燈則辛酉後事也

吳天泰

二首

天泰字謚生秀水人歲貢生有星帶草堂集

示族子

人生各分定如面異黔
哲讀書求仕宦運數杳莫測
不如事田畝勤苦但食力
我家本清門中葉浸流失
相將習游閒遂乃離樸質
流覽五服遙頗喜見諸姪
水國采菱魚陸海種秔秫
上可奉高堂俯足寧家室
少游嘗有言款段與下澤
鄉里稱善人庶幾念祖德

題周仲吉畫

雪色滿天地扁舟傍深谷
危峰入層雲幽意動遐矚
溪橋凍未澌老鶴立寒木

吳麟玉

一首

麟玉字稚禎別號雪翁秀水縣學生有醉月聽

溪二軒詩藁

邨居

屏跡市廛外烟邨聊索居貧無乞米帖嬾有絕交書松
下近調鶴雨餘新種書更添數竿竹遮却往來車

徐

淮

一首

淮字愛竹嘉興縣學生有愛竹軒詩

宿金粟寺

昨歲曾游此，莓牆墨尚新。雨花長似粟，觀海更無津。下

榻便行客，烹茶費主人。

時查孝廉寓此讀書

年來稀戰伐，鼙鼓但

迎神。

鼓係孫權所留

徐仲選

一首

仲選字華海，一字鶴友。海鹽人，國子監生。有鶴

友詩藁。

詩話：鶴友近體刻意學陸務觀。

水邨

照檻晴光眼未迷
瘦藤斜影度橋西
沙頭白鴨黃鵝睡
籬畔瓜棚豆架低
屋似魚船疎荻繞
亭如僧笠稚松齊
此鄉風景真堪戀
只合攜筇坐菜畦

嚴紹宗一首

紹宗字隨翁無錫人有鳩緣集

新秋廷鳴移具小樓待月

秋至杳無跡
颯然風滿林
倚樓羈客思
呼棧故人心
紅

葉疎簾冷青蘋小院深月明今共賦心事兩浮沈

曾元良 一首

元良字君山秀水人有烟波集

秋柳

俄驚搖落渭城邊悵望遙隄絕可憐病葉幾能經驟雨
柔條猶自鎖寒烟從教歌院頻翻譜忍見郵亭更折鞭
淒斷新霜板橋曲衰荷相伴曉風天

高秉集 二首

秉篳字友葵松江華亭人縣學生有潤照堂詩

湖隄

舍館意未安游覽力已猛披衣出芳原蒼翠周四屏琳
宮千百尺截窠吞顥景蘭若非一居鱗次若萬井旋窺
大佛寺却失龍象整其陽枕江濤其陰負修嶺步步異
前蹤行行惜去境斷橋曾不斷石隄相與永綠柳何歲
甃間之桃與杏柔颼翦綺縠密葉含藻荇羣秀欣有託
萬象紛然炳歎息蘇長公千載若俄頃江山不改舊風

月誰為領撫景念往昔令人發深省

淨慈寺

維艸綠楊岸爰命理輕策從者四五人鈎衣防亂石南
屏鬱岩堯琳宮寄率律柱礎錯互置枕拱向背出檻鳳
威羽翔幢龍鱗甲拆法象有三身應真計五百伊昔壽
禪師于此布法席言銓雖已繁圓鏡乃歸一我來祇樹
下髣髴天竺國碧篠吐笙簧青松韻琴瑟口分茵陳飯
手展貝多帙逆風發旃檀香氣何馥醇非無豪士豪為

憚律僧律徒倚澹忘歸山空落紅日

沈文煇 一首

文煇字履亨嘉興縣學生有瓜田遺橐

西莊

乍喜人烟別都無俗客喧漸能諳稼穡不復厭雞豚
仄徑苔梅古疎籬竹屋存東塍近僧院清磬報黃昏

繆師伋 一首

師伋字孟思嘉興人

九日

黃菊東籬下還逢九日開今朝尊酒盡無復白衣來

周青

士云
調合

顧玘徵一首

玘徵字文玉嘉興縣學生有讀書臺橐

感舊

烏衣門巷舊游非王謝堂前燕子稀有客有客莫遑處
式微式微胡不歸乾坤萬里愁雲合風雨三秋落葉飛

極目天涯誰與語釣蓬思老一魚磯

嚴焯 二首

焯字子尹常熟人有南虞小草

詩話子尹詩律頗細如詠雪云竹上有聲如雨
夜庭中無月亦明時令永嘉四靈見之定把臂
入林也

長相思

長相思在夢中自君之出羅幃空牕前浙浙來朔風滿
天霜雪鳴孤鴻楓林青兮關塞黑終然萬里魂難通長

相思何時終

初夏偕顧魏二子游西關

散步西郊任所之
雨餘新綠倍濃時
同游此日還同散
明日分飛各不知

曹臣一首

臣字野臣歛人有鬼訂集

郝公琰墓下作

郝之璽今已矣
憶君棄我已三年
一棺裹骨黃泉裡
我

欲呼君君不起慘栢悲松聲聒耳幾莖瘦草不成叢是
我頻來淚澆死

湯傳楹二首

傳楹字子輔更字卿謀吳縣學生有湘中草

倚樓

天影一何澹空庭無雜喧暮山隨靄沒黃葉帶鴉翻無
徑不秋草與鄰同小園偶然搔首處竟夕未能言

渡口別

一水盈盈便渺然夕陽搖落渡頭船長堤燈火人歸後
回首西樓盡暮煙

馮元仲一首

元仲字次牧慈谿人有天益山房詩集

題晏常侍祠

嗚呼晏常侍石室存道統上像皇帝三其左周召孔宋
之四大儒一一接其踵我我殿三楹像皆刻石奉四壁
龕者五分標五經總古人所未聞此是我作俑猗彼何

人斯卓哉儒者勇

詩話都城西山弘教寺傳是正德間中書晏忠所造寺前有澗過澗壘石為門題曰道統門石殿三楹上琢三皇五帝三王像左鑿周召孔孟諸聖賢右鑿周程張朱諸儒像別一石龕以藏五經殿外一石亭壁列鐘簋干戚錢鏹弁裳之屬左龍馬馬毛旋五十五數具一如河圖右龜龜甲四十五數具一如洛書東堂三楹壁列忠臣龍比以下孝子曾閔以下若干人按元史秦定二年中書省言養給軍民必藉地利世祖建大宣文弘教寺賜永業當時已號虛費今遺蹟已無可考觀晏公祠石象禮器制度渾朴不類明時匠人所鑿且元於儒釋初無所分疑寺即宣文弘教之遺址晏忠特從而修飾之爾金華姜給事應甲詩云空山石祠堂落穆跨深壑

肖像古聖賢高下坐淵漢殿墀列龜龍如出自
河洛煌煌先儒語所為忠孝作性理累百卷題
壁見大略歷覽感吾心人傳晏公鑿厥志在尼
山高邈得所託媿哉彼檀施釁血塗丹腹則竟
以為常侍所鑿次牧亦沿其誤至云古人所未
聞此是我作俑不知祠宇列聖賢像始於文翁
踵於趙岐漢之遺碑若司隸校尉魯恭荊州刺
史李剛從事掾武梁祠皆有刻石聖賢像非作
俑比也

丁元公 一首

元公字原躬嘉興布衣晚為僧號願菴

詩話原躬負奇恒與俗齟齬書畫俱入
逸品兼精籀篆詩亦不屑作庸熟語

題畫木芙蓉

吹遍鯉魚江岸風露條霜蕊一叢叢謝家池上秋容

一作

空闊十里長隄間白紅

喻應益

一首

應益字叔虞新建人

滕王閣

飛閣千年勝跡留層巒遠水檻中收萋萋岝綠王孫草
湛湛江平帝子洲煙樹尚含羅綺怨風濤不散管絃愁

飄零莫縱登高目，門掩斜陽獨下樓。

馮夢龍一首

夢龍字猶龍，長洲人。由貢生選授壽寧知縣，有七樂齋橐。

詩話：明府善為啓顏之辭，間入打油之調，雖不得為詩家，然亦文苑之滑稽也。

冬日湖邨即事

蒹葭一望路三叉，遙認莊窩去路斜。
舟響小溪過蟹舍，屋顏高岸露牛車。
輕霜隄柳餘疎葉，暖日村桃早放花。

平野蕭條聊極目
遠天寒影散羣鴉

明詩綜卷七十四